

四庫全書

史部

欽定四庫全書

剡錄卷五

宋 高似孫 撰

書

戴逵五經大義三卷

戴逵老子音一卷

戴逵纂要一卷

戴逵竹林七賢論

戴逵集十卷

戴逵別傳一卷

戴顓中庸傳一卷

戴顓月令章句十二卷

戴顒逍遙論

戴氏琴譜四卷

戴氏譜一卷

阮裕別傳一卷

阮氏譜一卷

王羲之集九卷

王羲之別傳一卷

王氏世家五卷

王氏家牒十五卷

王氏家譜二十卷

謝玄集十卷

謝氏家譜一卷

孫綽集十五卷

許詢集三卷

支遁集八卷

支遁傳一卷

支遁經論三卷

秦系注老子一卷

吳筠元綱一卷

秦系詩一卷

靈澈詩十卷

鄭言平剡錄一卷

謝靈運集十五卷

謝靈運七集十卷

謝靈運賦九十二卷

謝靈運連珠集五卷

謝靈運集鈔十卷

謝靈運集詩五卷

謝靈運詩英九卷

謝靈運游山志一卷

謝靈運山居志一卷

顧歡政綱一卷

葛仙翁別傳一卷

葛仙翁神仙傳十卷

文

遺支遁書

支遁還吳住支山寺晚欲入剡謝安為吳興與遁書曰  
思君日積計辰傾遲知欲還剡自治甚以悵然人生如  
寄耳頃風流得意之事殆為都盡終日感感觸事惆悵  
唯遲君來以晤言銷之一日當千載耳此多山水山縣  
間靜差可養疾事不異剡而醫藥不同思必此緣副其

積想也

高僧傳

申三復贊

戴逵

安道文章世豈復

可見今得六篇

嗜好深則天機淺名利集則純白離如此故識鑒逾昏  
驕淫彌汰心與慎乖則理與險會然後役智以御險履  
險以逃害故陰陽寇其內人力攻其外陰陽結則金石  
為之消人事至則雖智不足賴若然者雖翠幄華堂焉  
得而康之列鼎重味焉得而嘗之

閒遊贊序

戴逵

神人在上輔其天理知溟海之禽不以籠樊服養櫟散  
之質不以斧斤致用故能樹之於廣漠棲之於江湖載  
之以大猷覆之以元風使夫淳朴之心靜一之性咸得  
就山澤樂閑曠箕嶺之下始有閒遊之人焉降及黃綺  
逮于臺尚莫不有以保其太和肆其天真者也且夫巖  
嶺高則雲霞之氣鮮林藪深則蕭瑟之音清其可以藻  
元瑩素全其皓然者舍是焉由故雖援世之彥翼教之

傑效舞雩以發詠聞乘桴而懷厲況乎道乖方內體絕  
風塵理楫長謝歌鳳逡巡盪八紘於元流澄雲崖而怡  
神者哉然如山林之客非徒逃人患避爭門諒所以翼  
順資和滌除機心容養淳淑而自適者爾凡物莫不以  
適為得以足為至彼閒遊者奚往而不適奚待而不足  
故蔭映巖流之際偃息琴書之側寄心松竹取樂魚鳥  
則澹泊之願於是畢矣然竒趣難均元契罕遇終古皆  
孤棲於一巖獨玩於一流苟有情而未忘有感而無對



則輟斤寢絃之歎固以幽結於林中驟感於遐心為日  
久矣我故遂求方外之美畧舉養和之具為雜贊八首  
暢其所託始欣閒遊之暇逸終感嘉契之難會以廣一  
往之詠以抒幽人之心云爾

贊

戴逵

茫茫草昧綿邈元世三極未鼓天人無際萬器既判靈  
朴乃翳實有神宰忘懷司契冥外旁通潛感莫滯總順  
巢高魚應夷惠緬矣遐心超哉絕步顧揖百王仰怡泰

素矜其天真外其囂務詳觀羣品馳神萬慮誰能高映  
悠然一悟

尚長贊

戴逵

尚叟冲順庸行昏世和同婉約元識罔滯瞻彼崇高俄  
為塵翳亦有同好潛心宿契超超增翥眇眇偕逝絕跡  
青崖影滅雲際

酒贊

戴逵

醇醪之興與理不乖古人既陶至樂乃開有客乘之隗

若山頽

山贊

戴逵

蔚矣名山亭亭洪秀並基二儀嶢嶢雲構嵯峨積岨寥  
籠虛岫輕霞仰拂神泉旁漱曰仁奚樂希靜比壽

松竹贊

猗歟松竹獨蔚山臯肅肅脩竿森森長條

褚先生伯玉碑

孔德璋

先生築館金庭觀蕭子顯齊  
書曰伯玉隱剡之瀑布山

河洛摘寶神道之功可傳嵩華吐祕仙靈之跡可觀蓋  
事詳於玉牒理煥於金符雖冥默難源顯晦異軌測心  
觀古可得而言焉是以子晉笙歌馭鳳於天海王喬雲  
舉控鶴於元都亦有羽蛻蟬蠲影遁形銷神翥帝宮迹  
留劍杖遊瑤池而不返宴元圃以忘歸永嘉惡道者窮  
天地之險也歆竇遏日折石橫波飛浪突雲奔湍急箭  
先生攀途躋阻宿柶涉折而衝颶夜鼓山洪暴激忽乃  
崩舟墜壑一裂十仞飄地淪篙翻透無底徒侶判其水

碎舟子悲其電散危魂中夜赴阻相尋方見先生恬然  
安席銘曰

關西升妙洛右飛英鳳吹金闕簫歌玉京絕封萬古乃  
既先生先生浩浩唯神其道泉石依情烟霞入抱祕影  
窮岫孤棲幽草心圖上玄志通大造

金庭館碑

沈約

生靈為貴有識斯同道天云及

疑有字誤

終天莫及故仙學

之秘上聖攸尊啓玉笈之幽文貽金壇之妙訣駐景濛

谷還光上枝吐吸烟霞變鍊丹液出沒無方升降自己  
下棲洞室上賓羣帝覩靈岳之驟啟見滄波之屢竭望  
元州而駿驅指蓬山而永驚芝蓋三重駕螭龍之蜿蜒  
雲車萬乘載旗旆之逶迤此蓋棲靈五岳來暨夫三清  
者也若夫上玄奧遠言象斯絕金簡玉字之書元霜絳  
雪之寶俗士所不能窺學徒不敢輕慕且禁誓嚴重志  
業艱劬自非天稟上才未易可擬自惟凡劣識鑒鮮方  
徒抱出俗之願而無致遠之力早尚幽棲屏棄情累留

愛巖壑記分魚鳥塗逾遠而靡倦年既老而不衰高宗  
明皇帝以上聖之德結宗元之念忘其菲薄曲賜提引  
末自夏汭固乞還山權憇汝南縣境固非息心之地聖  
王纘歷復蒙繫維永泰元年方遂初願遂遠出天台定  
居茲嶺所憇之山實惟桐栢實靈聖之下都五縣之餘  
地仰出星河上參倒景高嵯萬沓邃澗千迴因高建壇  
憑巖考室飭降神之宇置朝禮之地桐栢所在厥號金  
庭事曷靈圖因以名館聖上曲降幽情留信彌密置道

士十人用祈嘉祉越以不才首膺斯任永棄人羣竄景  
窮麓結懇志於元都望霄容於雲路仰宣國靈介茲景  
福延吉祥於清廟納萬壽於神躬又願道無不懷澤無  
不至幽荒屈膝戎貊稽顙息鼓輟烽守在海外因此自  
勉無遂微誠日夕勤劬自强不已翹心屬念晚卧晨興  
殮正陽於停午念孔神於中夜將三芝而延佇飛九丹  
而宴息乘鳧輕舉留舄忘歸以茲丹款表之元極無曰  
在上日鑒非遠銘石靈館以旌厥心其辭曰



道無不在若存若亡於惟上學理妙羣方用之日損言  
則非常儵焉靈化羽變蛻裳九重嶢峩三山璀璨日為  
車馬芝成宮觀虹旂拂月龍輶漸漢萬春方華千齡始  
旦伊余菲薄竊慕隱淪尋師請道結友問津東探震澤  
西遊漢濱依稀靈眷髣髴幽人帝明紹歷惟皇纂位屬  
心鼎湖脫屣神器降命凡塵仰祈靈秘瞻彼高山興言  
覆瓿啟基桐栢厥號金庭喬峰迴峭擘漢分星臨雲置  
壇駕岳開櫺闔塗蹇產林折葱青誰謂應遠神道微密

慶集宮闈祥流罕畢其久如地其恒如日壽同南山與  
天無卒更生變練外示無功少君飛轉密與神通因資  
假力輕舉騰空庶憑嘉佑永濟微窮

金庭觀晉右軍書樓墨池記

裴通

越中山水奇麗剡為最剡中山水奇麗金庭洞天為最  
洞在縣東南循山趾右去凡七十里得小香爐峰峰則  
洞天北門也谷抱山關雲重烟巒迴互萬變清和一氣  
花光照夜而常晝水色含空而無底此地何事常聞異

香有時值人從古不死真天下絕境也有晉代六龍失馭五馬渡江中朝衣冠盡寄南國是以瑯琊王羲之領右軍將軍家於此山書樓墨池舊制猶在至南齊永元三年道士褚伯玉仍思幽絕勤求上元啟高宗明皇帝於此山置金庭觀正當右軍之家書樓在觀之西北維一間而四徘徊高可二丈墨池在殿之東北維方而斜廣輪可五十尺池樓相去東西計之纔可五十餘步雖形狀卑小不足以壯其瞻翫而泰儉有守斯可以示於

將來況乎處所遐深風景秀異勢逍遙之至理閱鸞鶴  
之參差其金庭洞天即道門所謂赤城丹霞第六洞天  
者也按上清經洞天在天台桐栢山中辟方四十里北  
門在小香鑪峯頂人莫得見之樵夫往往見之者或志  
之以奇花異草還報鄉里與鄉里同往則失其所志也  
過此峰東南三十餘里石竇呀為洞門即洞天之便門  
也人入之者必羸糧秉燭結侶而往約行一百里二百  
里多為流水淤泥所阻而返莫臻其極也通以元和二

年三月與二三道友裹足而遊登書樓臨墨池但見其山水之異也其險如崩其聳如騰其引如肱其多如朋不四三層而謂天可昇經再而還以書樓闕壞墨池荒毀語於邑宰王公王公瞿然徵王氏子孫之在者理荒補闕使其不朽即事題茲實錄而已

沃洲山禪院記

白居易

沃洲山在剡縣南三十里禪院在沃洲山之陽天姥峯之陰南對天台而華頂赤城列焉北對四明而金庭石

鼓介焉西北有支遁嶺而養馬坡放鶴峯次焉東南有石橋溪溪出天台石橋因名焉其餘卑巖小泉如子孫之從父祖者不可勝數東南山水越為首剡為面沃洲天姥為眉目夫有非常之境然後有非常之人棲焉晉宋以來因山洞開厥初有羅漢僧西天竺人白道猷居焉次有高僧竺法潛支道林居焉次又有乾興淵支道開威蘊宗實光識斐藏濟度逞印凡十八僧居焉高士名人有戴逵王洽劉恢許元度殷融郝超孫綽桓彥表

王敬之何次道王文度謝長霞袁彥伯王濛衛玠謝萬  
石蔡叔子王羲之凡十八人或遊焉或止焉故道猷詩  
云連峰數千里脩林帶平津茅茨隱不見鷄鳴知有人  
謝靈運詩云暝投剡中宿明登天姥岑高高入雲霓安  
期還可尋蓋人與山相得於一時也自齊至唐茲山寢  
荒靈境寂寥罕有人遊故辭人朱放詩云月在沃洲山  
上人歸剡縣江邊劉長卿詩云何人住沃洲此皆愛而  
不到者也大和二年春有頭陀僧白寂然來遊茲山見

道猷支竺遺跡泉石盡在依然如歸故鄉戀不能去時  
浙東廉使元相國聞之始為卜築次廉使陸君中丞知  
之助其繕完三年而禪院成五年而佛事立正殿若干  
間齋堂若干間僧舍若干間夏臘之僧歲不下八九十  
安居遊觀之外日與寂然討論心要振起禪風白黑之  
徒附而化者甚衆嗟乎支竺歿而佛聲寢靈山廢而法  
不作後數百歲而寂然繼之豈非時有待化有緣耶六  
年夏寂然遣僧常贄自剡抵洛持書與圖詣從叔樂天



乞為禪院記道猷肇開茲山寂然嗣興茲山樂天又垂  
文茲山異乎哉沃洲山與白氏其世緣乎

龍宮寺碑

李紳

會稽地濱滄海西控長江大禹疏鑿了溪人方宅土南  
巖海跡高下猶存司其水旱鳴為雲雨乃神龍之鄉寺  
曰龍宮在剡靈芝鄉嵒亭里地形爽塏林嶺依抱剡宇  
頽毀積有年所自創三徙始定此地像儀消化鐘磬不  
揚堵波已傾法輪莫轉老釋脩真護念常啟歲月屢遷

物力無及貞元十八載余以進士客江浙將適天台與  
脩真會於剡之陽師言老禪有念今茲果矣後當領鎮  
此道幸願建飾以資福履余笑不答師曰星歲有期愚  
有冥告元和三年余罷金陵從事河東薛公苹招遊鏡  
中師已卧病約言無易大和癸丑自分命洛陽詔以檢  
校左騎省庶寮於茲歲逾再紀脩真已為異物龍宮棟  
宇將盡命告墳塔因追昔言以頭陀僧會真部工藏事  
捐錢三十萬監軍使毛公承泰亦施焉從事寮吏咸同

勝因閭里慕仁風靡爭施子來之功雲集清涼之宇鬱  
興浹旬而垣墉周逾月而棟幹合煥矣真界昭乎化城  
擇靜行僧居之以總寺事資我后無疆之祚資龍神水  
府之福一雨之施潤洽必同七郡山澤城邑萬人介福  
所安翳我龍德用迴法力永資泉宮刻石記言於寺之  
剎銘曰滄海之隅會稽巨澤惟禹功力生人始藉土壤  
山嶼濱海之東溟漲空濶邈祕龍宮貝闕難知珠宮莫  
測雲雨交昏深沈不隔聞法必聽依佛必降豈騰溟海

亦化長江既資勝因為龍景福節宣風雨以成播育撞  
鐘必告三界必聞唯爾龍室昭昭不昏我昔麻衣有僧  
傳信斯人已亡斯言不泯敬報前志以垂後功建飾儀  
相昭明有融普利羣生罔資已力琢磨記言

弔剡溪古藤文

舒元興

剡溪上縣四五百里多古藤株栴逼土春入土脈他植  
發活獨古藤氣候不覺絕盡生意予以為本乎地者春  
到必動此藤亦本於地方春且死色遂問溪上人有道

者曰谿多紙工萬斧斬伐無時擘剝皮膚以給其業噫  
藤雖植物溫而榮寒而枯養而生殘而死亦將有命於  
天地間今紙工斬伐不得發生是天地氣力為人中傷  
物之疾癘異日過數十百郡東雒西雍見書文者皆以  
剡紙相夸予悟剡藤之死職止由此此過固不在紙工  
且今九牧人士自言能見文章戶牖者數與麻竹相多  
聽其語其自安重皆不啻握驪龍珠苟有晚寤者其倫  
甚寡不勝衆者固以斂手無語勝衆者自謂天之文章

歸我輕傲聖人道使周南風骨入於折楊皇華中言偃  
卜子夏文學陷入於淫靡放蕩中比肩握管動盈數千  
百人數千百人筆下動數千萬言不知其為謬誤日月  
以縱自然殘藤命易其柯葉流波頽沓未見止息如此  
則綺文妄言輩誰非書剡紙者邪工嗜利曉夜斬藤以  
鬻之舉天下為剡溪猶不足以給況一剡溪者耶後之  
日不復有藤生於剡矣大抵人間費用苟得著其理則  
不枉之道在暴耗之過莫由橫及於物物之資人亦有

其時時其斬伐不為天關予謂今之錯為之文者皆天  
關剡溪藤之流也藤生有涯而錯為文者無涯無涯之  
損物不直於剡藤而已余取剡藤以寄其悲

剡錄卷五

欽定四庫全書

剡錄卷六上

宋 高似孫 撰

詩

詩中有及  
剡者采焉

登臨海嶠初發疆中作

謝靈運

杪秋尋遠山山遠行不近與子別山阿含酸赴脩軫中  
流袂就判欲去情不忍顧望脰未悵汀曲舟已隱隱汀  
絕望舟驚棹逐驚流欲抑一生歡並奔千里游日落當



棲薄繫纜臨江樓豈惟夕情斂憶爾共淹留淹留昔時  
歡復增今日歎茲情已分慮況乃協悲端秋泉鳴北澗  
哀猿響南巒戚戚新別心悽悽久念攢攢念攻別心旦  
發清溪陰暝投剡中宿明登天姥岑高高入雲霓還期  
那可尋儻遇浮丘公長絕子徽音

尋沈剡至嵯亭

虞騫

命楫尋嘉會信次歷山原捫天上雲紉與石下雷奔澄  
潭寫度鳥空嶺應鳴猿榜歌唱將夕商子處方昏

遊沈道士金庭館

沈約

秦皇御宇宙漢帝恢武功  
懽娛人事盡情性猶未充  
銳意三山上託慕九霄中  
既表祈年觀復立望仙宮  
寧為心好道直由意無窮  
曰余知止足是願不須豐  
山嶂遠重疊竹樹近蒙籠  
開襟濯寒水解帶臨清風  
所累非外物為念在玄空  
朋來握石髓賓至駕輕鴻  
都令人徑絕唯使雲路通  
一舉凌倒景無事適華嵩  
寄言賞心客歲暮爾來同

徵鏡湖故事

將尋鍊藥井更逐賣樵風

凡初

刻石秦山上探書禹穴

中

呂渭

谿邊尋五老橋上覓雙童

巖維

梅市西陵近蘭

亭上道通

謝良弼

雷門驚鶴去射的驗年豐

賈肅

古寺思

王令孤潭憶謝公

鄭槩

帆開巖上石劒出浦間銅

庾駸

興裏還尋戴東山更向東

裴冕

壯游

杜甫

越女天下白鏡湖五月涼剡溪蘊秀異欲罷不能忘歸

帆拂天姥中歲貢舊鄉氣劇屈賈壘目短曹劉牆

淮海對雪

李白

朔雪落吳天從風渡溟渤海樹成陽春江沙皓明月飄  
颻四荒外想像千花發瑤草生階墀玉塵散庭闕興從  
剡溪起思繞梁園發寄君郢中歌曲罷心斷絕

別儲邕之剡中

李白

借問剡中道東南指越鄉舟從廣陵去水入會稽長竹  
色谿下綠荷花鏡裏香辭君向天姥拂石卧秋霜

贈陸調

李白

挂席候海色當邑下長川多酤新豐醪滿載剡谿船中  
途不遇人直到爾門前大笑同一醉取樂平生年

贈王判官

李白

昔別黃鶴樓蹉跎淮海秋俱飄零落葉各散洞庭流中  
年不相見蹭蹬遊吳越何處我思君天台綠蘿月會稽  
風月好却遶剡溪迴雲山海上出人物鏡中來

避地剡中贈崔宣城

李白

忽思剡溪去水石遠清妙雪盡天地明風開湖山貌悶  
為洛生詠醉發吳越調赤霞動金光日足森海嶠獨散  
萬古意閑垂一溪釣猿近天上啼人移月邊棹無以墨  
綬苦來求丹砂要華髮長折腰將貽陶公誚

秋山寄衛尉張卿及王徵君

李白

何以折相贈白花青桂枝月華若夜雪見此令人思雖  
然剡溪興不異山陰時明發懷二子空吟招隱詩

寄韋南陵

李白

春風狂殺人一日劇三年乘興嫌太遲焚却子猷船夢  
見五柳枝已堪挂馬鞭何日到彭澤長歌陶令前

夢遊天姥吟留別

李白

海客談瀛洲烟濤微茫信難求越人語天姥雲霓明滅  
不可覩天姥連天向天橫勢拔五嶽掩赤城天台四萬  
八千丈對此欲倒東南傾我欲因之夢吳越一夜飛度  
鏡湖月湖月照我影送我至剡溪謝公宿處今尚在淥  
水蕩漾清猿啼脚著謝公屐身登青雲梯半壁見海日

空中聞天雞千巖萬壑路不定迷花倚石忽已暝熊咆  
龍吟殷巖泉慄深林兮驚層巔雲青青兮欲雨水澹澹  
兮生煙列缺霹靂立巖崩摧洞天石扉訇然中開青冥  
浩蕩不見底日月照耀金銀臺霓為衣兮風為馬雲之  
君兮紛紛而來下虎鼓瑟兮鸞迴車仙之人兮列如麻  
忽魂悸以魄動恍驚起而長嗟惟覺時之枕席失向來  
之烟霞世間行樂亦如此古來萬事東流水別君去兮  
何時還且放白鹿青崖間須行即騎訪名山安能攢眉



折腰事權貴使我不得開心顏

送王屋山人魏萬還王屋

李白

遙聞會稽美一度耶谿水萬壑與千巖崢嶸鏡湖裏秀  
色不可名清輝滿江城人游月邊去舟在空中行此中  
久延佇入剡尋王許笑讀曹娥碑沈吟黃絹語

魯東門汎舟

李白

日落沙明天倒開波搖石動水潏洄輕舟帆月尋溪轉  
吾是山陰雪後來

水激龍盤犯石堤桃花夾岸魯門西若教月下乘舟去  
何啻風流到剡溪

秋下荆門

李白

霜落荆門江樹空布帆無恙挂秋風此行不為鱸魚膾  
自愛名山入剡中

送定法師

楊巨源

鳳城初日照紅樓禁寺公卿識惠休詩引棣華霑一雨  
經分貝葉向雙流孤猿學定前山夕遠雁傷離幾地秋

空性碧雲無處所約公曾許剡溪游

雲門五谿

許渾

此谿何處路遙問白髭翁佛廟千巖裏人家一島中  
魚傾荷葉露蟬噪柳條風急瀨鳴車軸微波漾釣筒  
石苔縈棹渌山果拂舟紅更就前溪宿村橋與剡通

湖上蘭若示清會上人

清晝

峯心惠忍寺嵒頂謝公山何似南湖近芳洲一畝間  
意中雲木秀事外水禽閒永日無人到時看獨鶴還

剡溪行

朱放

潺湲寒溪上自此成離別  
回首望歸人移舟逢暮雪  
頻行識草樹漸老傷年髮  
唯有白雲心為向東山月

剡溪舟行

六言

朱放

月在沃洲山上人歸剡縣  
江邊漠漠黃花覆水時時  
白鷺驚船

送王公還剡中別業

皇甫冉

不見關山去何時到剡中  
已聞成樹木更道長兒童  
籬

落雲常聚村墟水自通朝朝隱去渡非晚對清風

袁郎中破賊後經剡中山水

皇甫冉

武庫分帷幄儒衣事鼓鼙兵連越徼外寇盡海門西  
節比全疎勒功當雪會稽旌旗迴剡嶺士馬濯耶谿  
受律梅初發班師草未齊行看佩侯印豈得訪丹梯

潤州南郭留別

皇甫冉

縈迴南北岸留滯木蘭橈吳岫新經雨江天正落潮  
故人勞見愛行客自無憀君問前程事孤雲入剡遙

冬中寄韋弁

李端

獨坐知霜下，開門見木衰。  
壯應隨日去，老豈與人期。  
廢井蟲鳴早，陰堦菊發遲。  
興來空憶戴，不似剡溪時。

送少微上人

李端

削髮本求道，何方不是歸。  
松風開法席，江月濯禪衣。  
飛閣猿鳴早，漫天過客稀。  
戴顓常執筆，不覺此身飛。

雲陽觀寄袁稠

李端

花洞晚陰陰，仙壇隔杏林。  
漱泉春谷冷，擣藥夜牕深。  
石

上開仙酌松間對玉琴戴家溪北住雪後去相尋

寄剡中友

項斯

歇馬亭西酒一卮  
半年閒事亦堪悲  
船橫鏡水人眠後  
蓼暗松江鴈下時  
山晚迴尋蕭寺宿  
雪寒誰與戴家期  
夜來忽覺秋風急  
應有鱸魚觸釣絲

過吳張二子檀溪別業

孟浩然

卜築因自然檀溪不更穿  
園廬二友接水竹數家連  
直取南山對非闕選地偏  
草堂時偃曝蘭棹日周旋  
外事

情都遣中流性所便閒垂太公釣興發子猷船予亦幽  
棲者經過竊慕焉梅花初臘月柳色半春天鳥泊隨陽  
雁魚藏縮項鰌停盃問山簡何似習池邊

宿雲門寺

宋之問

雲門耶谿裏泛鷁路才通夤緣綠篠岸遂到青蓮宮天  
香衆壑滿夜梵羣山空漾漾潭際月颼颼杉上風茲焉  
多嘉遁數子今莫同鳳歸嘅處士鹿化聞仙翁樵徑謝  
村北學井阿巖東永夜豈云寐曉景忽朦朧谷鳥嚙尚



澀源桃驚未紅再來期春暮當造林端窮庶幾蹤謝客  
開山投剡中

宿道一上方院

王維

一公棲太白高頂出雲煙梵流諸洞徧花雨一峯偏迹  
為無心隱名因立教傳鳥來還語發客去更安禪晝涉  
松路盡暮投蘭若邊洞房隱深竹靜夜聞遙泉向是雲  
霞裏今成枕席前豈唯暫留宿眠來將窮年

送惟律

崔子向

陽羨諸峯頂何曾異剡山雨晴秋到後木落夜開闌  
縫衲紗燈亮看心錫杖閒西方知有社未得與師還

寄嚴長史

章八元

昨辭夫子棹歸舟家在桐廬憶舊立三徑暖時花競發  
兩溪分處水爭流近聞江老傳鄉語遙見家山減旅愁  
或在醉中逢雪夜懷賢應向剡川遊

寄秦系

戴叔倫

北人歸欲盡猶自寓蕭山閉戶不曾出詩名滿世間

酬秦徵君春日見集

戴叔倫

終日媿無政與君聊散襟  
城根山半腹亭影水中心  
朗詠竹窓靜野情花徑深  
那能有餘興不作剡溪尋

早行寄朱放山人

戴叔倫

山曉旅人去天高秋氣悲  
明河川上沒芳草露中衰  
此別又萬里少年能幾時  
知心剡溪路聊且寄前期

訪秦系

韋應物

俗吏閒居少同人面會難  
偶隨香署客來訪竹林歡  
暮

館花微落春城雨暫寒  
甕間聊共酌莫使宦情闌

舟行入剡

崔顥

鳴棹下東陽迴舟入剡鄉  
青山行不盡綠水去何長  
地氣秋仍濕江風晚暫涼  
山梅猶作雨谿橘未知霜  
謝客文逾盛林公未可忘  
多慙越中好流恨閱時芳

送師弟往台州

崔峒

遠客乘流去孤帆向夜開  
春風江上使前日漢陽來  
路別猶千里離心重一杯  
剡溪木未落羨爾過天台

送越客

張籍

見說孤帆去東南到會稽春雲剡谿口殘月鏡湖西水  
鶴沙邊立山鼃竹裏啼謝家曾住處烟洞入應迷

送嚴維歸越州

李嘉祐

艱難只用武歸向浙江東松雪千山暮林泉一水通鄉  
心緣綠草野思看青楓春日偏相憶裁書寄剡中

送越州辛法曹

李嘉祐

但能一官適莫羨五侯尊山色垂趨府潮聲自到門緣

塘剡溪路映竹五湖村王謝登臨處依依今尚存

送晉光大師

師以草書應制

羅隱

禹祠分首戴灣逢健筆尋知達九重聖主賜衣憐絕藝  
侍臣搗藻許高蹤寧親久別街西寺待詔初離海上峯  
一種苦心師得了不須回首笑龍鍾

送裴饒歸會稽

羅隱

金庭路指剡川隈珍重良朋自此來兩髯不堪悲歲月  
一卮猶得話塵埃家通曩分心空在世逼橫流眼未開

笑殺山陰雪中客等閒乘興又須迴

送孔徵君

皇甫曾

谷口幽多處君歸不可尋家貧青史在身老白雲深掃  
雪開松徑疏泉過竹林余生負丘壑相送亦何心

趙能卿話剡之勝景

羅隱

會稽詩客趙能卿往歲相逢話石城正恨故人無上壽  
喜聞郎宰有高情山朝佐命層層聳水接飛流步步清  
兩火一刀罹亂後會須乘興月中行

送張司馬罷使適越

劉長卿

時危身赴敵事往任浮沈末路三江去當時百戰心春  
風吳苑綠古木剡山深千里滄波上孤舟不可尋

孤石

劉長卿

孤石自何處對之如舊遊氛氤嶺首夕青翠剡中秋迥  
出奇峯當殿前雪山靈鷲慚貞堅一片夏雲長不去莓  
苔古色空蒼然

雪夜訪別

劉長卿



扁舟乘興客不憚苦寒行晚暮相依處江湖欲別情水聲冰下咽沙路雪中平舊劒鋒鋌盡應嫌自贈輕

賈侍御自會稽使迴

劉長卿

江上逢星使南來自會稽驚年一葉落按俗五花嘶上國悲蕪梗中原動鼓鼙報恩看鐵劒命出金閨風物催歸緒雲峯發詠題天長百越外潮上小江西鳥道通閩嶺山光落剡溪暮帆千里思秋夜一猿啼栢署榮新寵桃源憶故蹊若為能亟去行復草萋萋

路入剡中作

方干

戴灣衝瀨片帆通高枕微吟到剡中  
掠草並飛憐燕子停橈獨飲學漁翁  
波濤慢撼長潭月楊柳斜牽一岸風  
便擬乘槎應去得仙源直恐接星東

山齋讀書寄校書

錢起

日愛衡茅下閒觀山海圖幽人自守朴窮谷也名愚隔  
嶺知溪雨新泉到戶樞蘭叢齊稚子蟠木老潛夫憶戴  
時過剡遊山慣入壺濠梁時一訪莊叟亦吾徒

憶吳處士

賈島

半夜長安雨燈前越客吟孤舟行一月萬水與千岑島嶼夏雲起汀洲芳草深何當折松葉拂石剡溪陰

竹下殘雪

邱為

一點銷未盡孤明在竹陰晴光夜轉潔寒氣曉仍深還對讀書牖且闕乘興心已能依此地終不傍瑤琴

送閻校書之越

邱為

南入剡中路草雲應轉微湖邊好花照山口細泉飛此

地饒古跡世人多忘歸經年松雪在永日世情稀芸閣  
應相望芳時不可違

題招隱寺

張祐

千年戴顓宅佛廟此崇脩古寺人名在清泉鹿跡幽竹  
光寒閉院山影夜藏樓未得高僧旨烟霞空暫遊

剡中贈張卿侍御

嚴維

辟疆年正少公子貴初還早列名卿位新參柱史班千  
夫馳驛道駟馬入家山深巷烏衣盛高門畫戟閒逶迤

天下樂照耀剡谿間自賦遊章句空為衰草顏

送嚴十五之江東

戎昱

江都萬里外別後幾悽悽峽路花應發津亭柳正齊酒  
傾遲日暮川濶遠天低心繫征帆上隨君到剡溪

送清散遊太白山

卷經歸太山躡躡別蘿龕龍若履浮雲上須看積翠南倚  
松身入漢暝日月離潭此境堪長往塵中事可諳

京口別崔固

積雨晴時近西風葉滿船相逢嵩岳客共聽楚城蟬宿  
館橫秋島歸帆漲遠田別君還寂寞不似剡中年

遊東峯宗密精廬

溫庭筠

百尺青崖三尺墳微言已絕杳難聞戴顓今日稱居士  
支遁他年識領軍暫對杉松如結社偶因麋鹿自成羣  
故山弟子空迴首葱嶺還應見宋雲

宋雲事見洛陽伽藍記

宿一公精舍

溫庭筠

夜聞黃葉寺瓶錫兩俱能松下石橋路雨中山殿燈茶

爐天姥客碁席剡溪僧還笑長門賦高秋卧茂陵

寄清凉寺僧

温庭筠

石路無塵竹徑開昔年曾伴戴顓來  
窓間半偈聞鐘後松下殘碁送客迴  
簾向玉峯藏夜雪砌因藍水長秋苔  
白蓮社裏如相問為說遊人是姓雷

送剡客

趙嘏

兩重江外片帆斜數里林塘遶一家  
門掩右軍餘水石路橫諸謝舊烟霞  
扁舟幾處逢溪雪長笛何人怨柳花

若到天台洞陽觀  
葛洪丹井在雲涯

送人之江東

劉商

含香仍佩玉  
宜入鏡中行  
盡室隨乘興  
扁舟不計程  
渡江霖雨霽  
對月夜潮生  
莫慮當炎暑  
稽山水不清

送張文新除溫州

趙嘏

東晉江山稱永嘉  
莫辭紅旆向天涯  
凝絃夜醉松亭月  
歇馬曉尋溪寺花  
地與剡川分水石  
境將蓬島共煙霞  
却愁明詔徵非晚  
不得秋來見海槎



送宣武從事越中

曉看呈使範知欲勅星軺水國難驅傳山城便倚橈  
秉籌先獨立持法稱高標旌旆臨危堞金絲發麗譙別愁  
當翠巘寬望隔風潮木落孤帆迴江寒壘鼓飄客鴻吳  
島盡殘雪剡汀銷坐想休秦嶽春應到柳條

送蕭鍊師入四明山

孟郊

閒於獨鶴心大於高松年迴出萬物表高棲四明巔千  
尋直裂峯百尺倒瀉泉絳雪為我飯白雲為我田靜言

不話俗靈蹤時步天

送談公

孟郊

坐愛青草上意含滄海濱  
渺渺獨見水悠悠不問人鏡  
浪洗手綠剡花入心春雖然  
防外觸無奈饒衣新行當  
譯文字慰此吟殷勤

剡溪館聞笛

丁仙芝

夜久聞羌笛寥寥虛客堂  
山空響不散溪靜曲宜長  
草木生邊氣城池逗夕涼  
虛然異風出髮髯宿平陽

贈江州李十使君員外

我本江湖上悠悠任運身  
朝隨採樵客暮伴打魚人  
跡為燒丹隱家緣嗜酒貧  
經過剡溪雪尋覓武陵春

剡錄卷六上

欽定四庫全書

剡錄卷六下

宋 高似孫 撰

詩

送越帥程公闢

趙汝礪

畫舫參差看欲飛  
紛紛車馬厭塵泥  
右軍筆墨空蘭渚  
安道風流訪剡溪  
白首得時歸莫遽  
丹心懷國去猶稽  
月明會醉蓬萊閣  
應笑雲霄自有梯

前題

曾孝宗

虎符分鎮浙江東  
艤棹都門使旆雄  
雙槳徘徊粉社日  
高牙搖曳剡溪風  
蓬萊閣讌公書簡  
賀監湖游獄榜空  
行聽越民謠德政  
亟還青瑣見旌忠

前題

劉奉世

使君遺愛徧南州  
五馬新歸瘴海頭  
捧橐未厭青鎖直  
懷章還作鑑湖遊  
餘姚人物傳吳遠  
越地山川向剡幽  
應有清詩資卧理  
會吟他日記風流

前題

王仲脩

一麾占得山川勝，金紐新提左顧龜。  
蒼闕門龍辭日下，紅旌引騎照江湄。  
剡溪月午何妨醉，曲水春餘好賦詩。  
玉案天香攜滿袖，錦衣誰似過鄉時。

晚泊嵎蒲寄剡縣劉貺員外

潘閔

曉泛剡溪水，晚見剡谿山。  
徘徊駐行棹，待月思再還。  
漁唱深潭上，鳥棲高樹間。  
應當金石友，念我無暫閒。

自諸暨抵剡

吳處厚

莫歎塵泥汨且圖山水遊維峯天姥翠一舸剡溪秋不  
見戴安道有懷王子猷西風無限意盡屬釣魚舟

夷猶雙槳去莫不辨東西夕照偏依樹秋光半落溪風  
高一鴈小雲薄四天低莽蕩孤帆卸水村楊柳隄

秋渚涵空碧秋山刷眼青排頭烟樹老撲面水風醒上  
瀨復下瀨長亭仍短亭夜船明月好客夢滿流螢

出得雲門路風悽日夕曛船撐鑑湖月路指沃州雲山  
色周遭見溪流屈曲分一觴還一詠誰似石將軍

憶越

楊蟠

蓬萊閣面對青山上遊人半是仙  
漁浦夕陽橫掛雨鑑湖春浪倒垂天  
高城尚鎖當時月故殿空留幾處煙  
長愛剡溪堪發興雪中曾棹子猷船

寄雲門運禪師

顏復

句谿曲曲剡山重誰訪桑門物外蹤  
起世有言皆實際示人無意在機鋒  
平生懷抱佳高遜壯歲衣冠鎖俗容  
每想清禪心暫寂秋聲蕭瑟夜庵松



雨霽剡谿

剡溪風雨霽航葦重行行到處楊柳色幾家荷葉聲噪  
蟬金鼎沸游水玉壺清最喜魚梁伴歸帆的的輕

剡中夜思

林槩

密樹芳穠碧草齊春華微度綠陰低溪連嵎水興何盡  
路接仙源人自迷落絮有情風上下好花無語日東西  
故園桃李經年別一望歸心遶翠蹊

剡溪書懷三絕

盧天驥

山鳥逢春恰恰啼  
桃花流水路猶迷  
何時鼠子膏齊斧  
笑領白雲歸剡溪

故園生事只衡茅  
不管方兄久絕交  
糲食枯椽吾易足  
鷓鴣只占一枝巢

山杏枝頭鶚鷃兒  
來傳春意語多時  
脆紅可是渾無力  
不奈東風盡日吹

泛剡溪

愁呵龜手冷搖鞭  
乘興來登訪戴船  
解事篙師小鳴舫

恐驚寒鴈入晴天

龍宮寺

華鎮

鹽梅器業尚風塵  
書劒曾游寂寞濱  
秀句玲瓏滿天下  
應搜佳麗入機神

金庭洞天

華鎮

嵩高秀入洛川清  
鶴去雲歸冷玉笙  
霜白金庭今夜月  
流風依約有遺聲

桃源

華鎮

嘉樹風生玉宇香  
鶯飛燕舞弄春陽  
歸來井邑皆如舊  
始覺仙家日月長

瀑布嶺

華鎮

春日雲崖晴杳杳  
東風山溜曉泠泠  
煙霞密邇神仙府  
草木微滋亦有靈

戴溪

華鎮

月華雪彩照長川  
一葉扁舟破紫煙  
十二瑤臺登賞夜  
清光長似昔時天

題戴溪亭

林東

溪亭故事幾年華來值秋霖眺望賒雲障山巒多少處  
雨埋煙火兩三家水肥去馬行高坂汀沒閒鷗上淺沙  
誰是子猷誰是戴小船盃酒興無涯

獨秀山

李易

訪戴溪長近若耶金庭雪對赤城霞沼從鵲舉添蕭索  
峯似鸞翔解歎嗟每愛林間百種蝶難忘竹外四時花  
剡川圖上他年指獨秀山前是我家

剡溪幽居

勝絕剡溪邊，巢枝度半年。  
燕回啣落絮，魚涌接飛泉。  
丹鼎山頭氣，茶爐竹外烟。  
幽居已成趣，佳致若為傳。

浴鵲沼

鵲沼開新鑑，纖塵莫遣遮。  
翠光爭水鳥，紅影湛山花。  
天外時分月，林端更蔚霞。  
高飛留舊跡，全付謫仙家。

龍潭二

雲巘移佳茗，風潭遶怪松。  
書傳黃石秘，稅可紫芝供。  
抵

玉休驚鵲懷珠且伴龍聽經誰氏子卉服秀仍恭  
敵騎侵淮海龍潭路始通雲生迷寶刹月皎現珠宮瀉  
澗泉噴薄依巖樹鬱葱神交難獨擅吾黨契元同

西溪

玉龍擘山開南驚肆奔猛風蕩雪濛濛月流光炯炯壯  
氣動貴門前驅入蛟井萬籟息中宵一區臨絕境奔雪  
有遺音垂磬得深省白雲何所聞就宿孤峯頂

登軍營塢

褰裳涉流水倚水送歸雲海角春潛到山腰路忽分伏  
龍應厭睡飛電駭論文鶴雀知機早翻然不待羣

居剡一篇寄鄭天和

金庭洞在桐栢山山高一萬八千丈中有神仙不死區  
郁郁黃雲覆其上透巖流壑遶四旁面勢參差皆意向  
雞登天姥有時聞鶴羨沃洲何待放彩衣大勝宮錦袍  
白髮奉親仍縱賞異才爭出輔清朝爽氣自欣遊碧嶂  
古來無位有重名吾家謫仙陸魯望平生願到猶不諧



矧彼區區走俗狀桃源康樂舊鄉存路接風烟聽還往  
渡江正為九華丹石笋飛泉歸指掌鸞翔鵠浴傳異時  
列岫方池間想像剡溪隨處可卜居乘興扁舟一相訪

貴門卜築

亂後亦擇居筮山山輒許居民百餘家喜甚手欲舞去  
久聞公名此幸殆天與感茲鄭重意時節共難黍剡川  
非沃野地僻民更寡趁時務擷茗餘力工搗楮寡婦念  
遺秉汚池憐數畧我欲教耦耕盡力循南畝桃杏種連

山深居可長處東鄰有節士酒酣乃發語公昔起布衣  
高議掩前古親擢類平津決見逢真主兩宮佇六飛萬  
乘思一舉交侵正倔强蠡起益旁午浩然公獨歸偶出  
寧有補默塞復何言長歎汗如雨

題龍潭壁

貴門今是鹿門山盡室扶攜萬壑間流水偶隨真自悟  
遙岑相望若為攀風翻竹塢慵休掃月過松扉靜不關  
潭底卧龍煩一起正須霖雨濟塵寰

書剡山所見寄周侍郎

剡山無數野薔薇黃雲爛熳相因依玉杯淺琢承墜露  
金鍾倒挂搖晨暉斑竹笋行三畝地紅藥花開一尺圍  
豆角嘗新小麥秀來禽向長櫻桃肥歌舌隨風柳外囀  
翠花帶水煙中飛魚跳破浪奮赤鬣鶴唳投松翻縞衣  
鄉關萬里久無夢巖壑四年今息機丁寧杜宇往江北  
為喚故人令蚤歸

題剡溪

我家住在剡溪曲萬壑千巖看不足却笑當年訪戴人  
雪夜扁舟去何速

山水戴逵邑尚餘清興中千巖落花雨一徑卷松風酒  
茗延幽子圖書伴老翁長生吾不羨久悟去來同

雪作望剡溪

玉樓瓊樹曉煙披擁袖開門四望迷清曠世人誰似我  
雪中更對子猷溪

懷剡川故居

烟光流轉太駸駸又見春山換綠陰蝴蝶夢中新歲病  
杜鵑聲裏故鄉心焦桐冷却風三尺瘦竹拖來月一尋  
早晚掉頭歸小隱誅茅千嶂白雲深

斷雲流水古巖隈憶得柴門半扇開雪打子猷船上過  
春從靈運屐邊來逃禪野榻排芳草覓句寒崖掃落苔  
容易三年拋絕去不勝啼月曉猿哀

病目飛蠅鬢雪乾欲扶吾道愧衰殘把他杓柄力何倦  
還我顰頭心便安待摘菜花添午供便裁荷葉備春寒


不辭高卧烟霞裏枕上青山最好看

剡溪

千古剡溪水無窮名利舟乘閒雪中興唯一王猷

了溪

禹迹始壺口禹功終了溪餘糧散幽谷歸去錫元圭



欽定四庫全書

制錄  
卷六下

十

制錄卷六下

# 欽定四庫全書

史部

剡錄卷七至十

詳校官監察御史<sub>臣</sub>沈孫璉

檢討<sub>臣</sub>德生覆勘

總校官進士<sub>臣</sub>繆琪

校對官助教<sub>臣</sub>胡予襄

膳錄舉人<sub>臣</sub>鍾廷瑛



欽定四庫全書

剡錄卷七

宋 高似孫 撰

畫

戴逵畫南都賦圖

戴安道就范宣學

中興書曰逵不遠千里往豫章范宣宣見逵異之以女妻焉

視

范所為范讀書亦讀書范抄書亦抄書唯好畫范以為無用不宜勞思於此戴於此乃畫南都賦圖范看

# 欽定四庫全書

史部

剡錄卷七至十

詳校官監察御史<sub>臣</sub>沈孫璉

檢討<sub>臣</sub>德生覆勘

總校官進士<sub>臣</sub>繆琪

校對官助教<sub>臣</sub>胡予襄

膳錄舉人<sub>臣</sub>鍾廷瑛

欽定四庫全書

剡錄卷七

宋 高似孫 撰

畫

戴逵畫南都賦圖

戴安道就范宣學

中興書曰逵不遠千里往豫章范宣宣見逵異之以女妻焉

視

范所為范讀書亦讀書范抄書亦抄書唯好畫范以為無用不宜勞思於此戴於此乃畫南都賦圖范看

畢咨嗟以為有益始重畫

戴逵畫行像

戴安道中年畫行像甚精妙庾道季看之語戴曰神

明太俗由卿世情未盡曰唯務光當免卿此語耳

列仙

傳曰務光夏時人也好鼓琴湯將伐桀謀於光曰伊尹何如務光曰強力忍詬不知其他湯克天下讓於光光曰吾聞無道之世不踐其土況讓我乎負石自沈於蓼水

王羲之像

金庭觀有右軍書樓墨池舊有羲之像

王徽之像

劉原父徽之像贊曰人生誰不知妄為世所束興來  
當暫往興盡期自復大雪暗溪路新晴月微燭去非  
斯人慕返豈斯人辱優游便所適偃蹇尚幽獨

李紳像

龍藏寺有唐李紳書堂舊有李紳畫像

剡中溪谷村墟圖

畫錄曰毛惠秀剡中溪谷村墟圖一卷隋朝官本李

嗣真續畫錄曰惠秀繪事頗為詳悉太自矜持翻成

羸絕不及惠遠

湘東王蕭繹續畫品曰毛梭惠遠之子便撓有餘真巧未足

王詵雪溪乘興圖

詵字晉卿東坡題其圖溪山雪月兩佳哉賓主談鋒  
夜轉雷猶言不見戴安道為問適從何處來藥城次  
韻亟往遙歸真曠哉聾人不識有驚雷雖云不必見  
安道已誤扁舟犯雪來

李易詩剡川圖上他年事獨秀山前是我家易歷給

事中嘗居剡之貴門山剡川固可圖自惠秀之後無  
其人耳又止剡溪道上詩一水縈不斷千嶺翠相扶  
扁舟訪雪月我昔見畫圖

訪戴圖

呂居仁答錢遜叔訪戴圖詩北風吹霜夜如雪江城  
草木凍欲折病夫袖手無所為一坐臨川已三月忽  
蒙妙句起衰憊頓覺和氣生毛髮公能忘機我亦倦  
不待文殊見摩詰畫圖是非久未解况保長年不磨

滅請公置畫莫多求要與時人除愛渴

李商老訪戴圖

當是商老所藏

李商老觀訪戴圖詩閑庭秋草積滿砌蒼苔深忽向  
冰紈上聊窺訪戴心雪月俱皎皎風林互森森縱觀  
停艫處猶聞擊汰音終年剡溪曲何嘗返山陰徒言  
興已盡真安誰能尋浮生圖畫爾慷慨為長吟

廉宣仲訪戴圖

宣仲名布號射澤老農  
宣和間為畫學博士

王銍云僕自會稽泛舟至剡中是時雪遲梅子烟外



萬枝來坼幽香不斷蓋非人間世也友人廉宣仲在  
四明聞之作子猷訪戴圖見寄作長句謝之仍書四  
絕句于圖後剡溪萬壑千巖景人境誰能識心境君  
畫山陰雪後船始悟前人發清興眼中百里舊山川  
荒林雪月縈寒烟應緣興盡故無盡賓主不見寧非  
禪當年戲留一轉語不意丹青能盡覩更畫人琴已  
兩忘妙盡子猷真賞處白玉花開碧玉轡戴逵溪上  
謝公山若教當日逢斯景肯道扁舟盡興還越溪梅

接剡溪濱得意還成一景春此日可憐高興盡扁舟  
處處作東隣山回水轉碧玲瓏月在羣山四合中香  
滿一船梅勝雪休誇訪戴畫屏風梅英與雪一般色  
不得北風香不知懶咏左思招隱句先生今有畫中  
詩

仲皎廬山圖

仲皎所作廬山圖窈窕清潤有詩書氣僧惟敬所藏  
先公翰林嘗跋

十八高士圖

先公翰林居剡作雪館於玉岑山又作集高亭繪晉  
入剡十八高士為圖列左右

紙

剡藤

李肇國史補白紙之妙者越之剡藤舒元興有悲剡  
川古藤文文在文卷中吳淑紙賦曰金花玉骨剡藤  
麻面劉禹錫詩精彩添隄墨波瀾起剡藤顧逋翁剡

紙歌雲路上山陰雪中有玉人持玉節宛委山裏禹  
餘糧石中黃子黃金屑剡溪剡紙生剡藤噴水揭為  
焦葉稜欲寫金人金口偈寄與山陰山裏僧手把山  
水紫羅筆思量點畫龍蛇出正是垂頭搨翼時不免  
向君求此物丁晉公紙詩妙制剡溪人多名錦水春  
歐陽公詩剡藤瑩滑如玻璃熊岑送程公闢詩溪藤  
頻得句雪舫夜留賓黃太史詩蠶尾銀鈎寫珠玉剡  
藤蜀蠶照松烟韓持國詩剡溪柔弱難爭強紫巖緊

實為最長李商老詩相望唇亡齒寒國書來莫惜剡  
溪藤僧巽中謝吳令惠越紙詩不用微文吊剡藤紙  
成功用貴深精布頭未足全彰美魚網徒勞獨擅名  
贈我喜同青玉案報公慙乏碧雲情道山何日鞭歸  
騎給札還應付長卿

剡紙

陸龜蒙詩宣毫利若風剡紙光如月梅聖俞詩已牋  
脆蠹不禁久剡楮薄慢還可怡

剡硯

薛能送浙東王大夫詩越毫逐厚俸剡硯得佳名注  
曰近相傳以擣熟紙名硯雞林志曰高麗紙治之緊  
滑不凝筆光白可愛號白硯紙林和靖詩紙軸敲晴  
響茶鐺煮晚濃和靖又有槐木紙椎贈周太祝詩輕  
如魚網滑如脂時寫新詩肯寄來硯紙其法椎擣也  
剡溪玉葉紙

皇甫松非烟傳曰臨淮武公業位河南功曹參軍愛

妾曰非烟北鄰子趙象窺見慕之象取薛濤詩以剡  
溪玉葉紙寫之達意於非烟烟復以金鳳紙題詩酬  
之

澄心堂紙

剡用南唐澄心堂紙其樣甚展新安志曰績溪紙乃  
澄心堂遺物歐陽公韓持國有澄心堂紙詩米元章  
薛道祖亦有詩

玉版紙

東坡詩溪石琢馬肝剡藤開玉版黃太史有次韻王  
炳之惠玉版紙詩

敲冰紙

張伯玉蓬萊閣詩敲冰呈好手織素競交鴛注曰越  
俗呼敲冰紙新安志曰紙敲冰為之益佳剡之極西  
水深潔山又多藤楮故亦以敲冰時為佳蓋冬水也  
呂本中詩敲冰落手盈卷軸頓使几案生清芬

羅牋



蘇易簡紙繒曰蜀人造十色牋其文謂之魚子牋又謂之羅牋剡溪有焉

古物

晉剡鍾

晉郭璞傳元帝為瑯琊王使璞筮遇豫之睽曰會稽當出鍾以告成功上有勒銘應在人家井泥中得之及帝即位太興初會稽剡縣人果於井中得一鍾長七寸二分口徑四寸半上有古文所書十八字云會

稽徽命餘字時人莫識

戴安道琴

琴箋曰安道一琴比常製長一尺

許承瓢

唐先天中女冠投簡金庭見褚伯玉所得許承瓢遂  
持以進

顧歡素琴

歡隱剡山齊高帝徵至進元綱優詔稱善賜歡素琴

顧歡麈尾

齊高帝又賜歡麈尾

秦系硯

秦系山居詩洗硯魚仍戲移樽鳥不驚系注老子穴

山石為研

剡西古硯

剡開元鄉民剡土值研色下品也渾璞泐蝕受墨處  
獨砥中隳凹處唐以前物銘玉在深山有道則見山

耶石耶陵谷幾變嗚呼此玉不晦不炫不以知貴不以棄賤

八角石硯

剡丁發硯於破冢外肖羲畫內鑿禹海越手輕爽石性已空入土老也銘二火一刀研與人俱高甲乙丙丁硯與數不逃石之饗志之勞文之騷人之豪

二大洗

吳莊漁人得之歸章氏章氏遺余銘金兮精火兮明

土兮英水兮清器兮貞人兮聲

翠壺

甲戌冬剡丁發諸荒墟壺範簡古蘚花黛綠銅性空  
入手輕其銘黛澤涵靈苔花布蹟金性積蛻土膏輟  
蝕

三足洗

表弟周樞得之清化銘尚古維人範模首智伊谷可  
陵厥用罔暨

剡錄卷七